

serviçio que los tales maravedis de las tales costas se gastasen en el dicho reparo, que mandase que resabiesen alla las dichas cuentas un ome bueno, qualquier la mi merçed fuese, e yo tovelo por bien. E porque vosotros sodes tales que guardaredes mi serviçio, es mi merçed de vos encomendar que tomedes las dichas cuentas.

Porque vos mando, a vos, los dichos adelantados e Anton Sanchez, recabdador, que amos a dos juntamente tomedes las dichas cuentas de los dichos diez e seys mil maravedis de las dichas lavores de los muros de las dichas çibdades de Murçia e Cartagena del tiempo aca quel dicho dotor Juan Rodriguez non las resçibio e de aqui adelante de cada año, para lo qual vos do poder conplido a amos a dos juntos e enbiat a fazer relaçion dello a los contadores mayores por vuestra carta firmada de vuestro nonbre e sellada con vuestro sello de como resabiestes de los dichos conçejos las dichas cuentas, porque los dichos mis contadores les libren luego los dichos maravedis de cada año, e sy algunos procuradores de las dichas çibdades se obligaron de venir a dar las dichas cuentas ante los dichos mis contadores mayores, es mi merçed que sean quantos de las dichas obligaciones e non fagades ende al.

Dada en la villa de Guadalfajara, veynte e siete dias de Junio, año del nasçimiento del nuestro Salvador Ihesuchristo de mill e quatroçientos e ocho años. Yo Diego Ferrandez de Vadiello la fiz escrivir por mandado de nuestro señor el rey e los del su conçejo. Don Pero Ponçe, Gomez Manrrique, Juan Rodriguez, dotor, Per Sançi, legum dotor. Archipiscopus Conpostelanus. Registrada.

LXXVI

1408-VI-28, Guadalajara.— Juan II a Garcia de Villagomez dándole autorización para que puedan traer vino y sal del reino de Aragón. (A.M.M. Cart. Real 1391-1412, fol. 50 v.)

Don Johan por la graçia de Dios rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Vizcaya e de Molina; a vos Garçia de Villagomez, criado e repostero del Infante don Ferrando, mi tio, e mi alcalde mayor de las sacas e de las cosas vedadas en el obispado de Cartagena con el reyno de Murçia, e a qualquier o a qualesquier alcalde o alcalles, guarda o guardas que por mi o por vos estan en los puertos e lugares fronteros de Aragon en el dicho obispado e reyno de Murçia, e a quien esta mi carta fuere mostrada o el traslado della signado de escrivano publico, salut e graçia.

Sepades quel conçejo, e alcalles, e cavalleros, escuderos, ofiçiales, e omes buenos de la çibdat de Murçia me enbiaron dezir en como la dicha çibdat esta



muy menguada de vino por razon de la mucha langosta que alla ha andado, e que va ha tan caro que lo non pueden aver sy non a muy grandes preçios.

E otrosy, me enbiaron dezir en como a esto mesmo grant mengua de sal, e dize que como quier que en el dicho reyno de Aragon vale de barato el dicho vino e sal e lo podrian de alla traer, pero que se non atreven por razon de la ordenança e vedamiento que yo tengo fecho en razon de las dichas sacas, e enbiaronme pedir por merçed que les proveyese sobre ello mandandoles dar mi carta en esta razon, e yo por les fazer merçed acorde de las dar liçençia para que puedan traer e trayan todos los vezinos de la dicha çibdat de Murçia o qualesquier dellos del dicho reyno de Aragon para la dicha çibdat todo el vino e sal que en qualquier manera menester ovieren, de oy dia de la data desta mi carta fasta fyn del mes de Setiembre primero que viene, e que lo puedan traer e trayan syn pena e syn colonia alguna non embargante la dicha mi ordenança e vedamiento que en esta razon yo tengo fecho, non levando ni trayendo ninguna de las otras cosas vedadas por mi.

Porque vos mando, a todos e a cada uno de vos, que dexedes e consyntades a los dichos vezinos de la dicha çibdat de Murçia e a qualquier o qualesquier dellos entrar al dicho reyno de Aragon e traer seguramente a la dicha çibdat todo el dicho vino e sal que en qualquier manera menester ovieren, de oy dia de la data desta mi carta fasta en fyn del dicho mes de Setiembre primero que viene como dicho es, non embargante la dicha mi ordenaçion e vedamiento que yo sobre ello tengo fecho, guardando todavia que non lieven ni trayan ninguna de las cosas por mi defendidas e vedadas e pagando.

Otrosy, sus derechos acostunbrados a las mis aduanas, e los unos e los otros non fagades ende al por alguna manera sopena de la mi merçed e de diez mill maravedis desta moneda para la mi camara a cada uno por quien fyncar de lo asy fazer e conplir e de como esta mi carta vos fuere mostrada, e los unos e los otros la cunplieredes mando sola dicha pena a qualquier escrivano publico que para esto fuere llamado que de ende al que vos la mostrare testimonio signado con su signo porque yo sepa en como conplides mi mandado.

Dada en Guadalquivar, veynte e ocho dias de Junio, año del nascimiento de nuestro Señor Ihesuchristo de mill e quatroçientos e ocho años. Yo la reyna, e yo el Infante, e yo Pero Garçia la fiz escrivir por mandado de los señores reyna e Infante, tutores de nuestro señor el rey e regidores de sus reynos.

